

Na osnovu člana 15. Zakona o principima lokalne samouprave (Sl.novine F BiH, broj: 49/06) člana 123. Statuta općine Bužim (Sl.glasnik općine Bužim, broj:12/15), Općinski načelnik općine Bužim, a na prijedlog Službe za opću upravu i društvene djelatnosti, je donio:

P R A V I L N I K

o dodjeli stipendija za akademsku 2019/2020 i drugih oblika finacijske pomoći studentima općine Bužim

I OSNOVNE ODREDBE

Član 1.

Ovim pravilnikom se uređuje pravni odnos između općine Bužim kao davaoca stipendije (u daljem tekstu: stipenditor) i redovnih studenata općine Bužim, kao korisnika stipendije (u daljem tekstu: stipendist), a naročito: način dodjele stipendija, prava i obaveze stipendista i način ostvarivanja tih prava, te prava i obaveze stipenditora.

Član 2.

Studenti općine Bužim, redovno upisani na fakultetima i višim školama u Bosni i Hercegovini imaju pravo podnijeti zahtjev za dodjelu stipendije pod uslovima i na način propisan ovim pravilnikom, a u granicama budžetom predviđenih sredstava općine Bužim za tu namjenu.

Sredstva predviđena budžetom koristiće se za stipandiranje studenata u 100% iznosu.

Pravo na drugi oblik pomoći mogu ostvariti učenici generacije osnovnih i srednjih škola, te postdiplomci sa područja općine Bužim.

Član 3.

Izbor stipendista vrši se na osnovu konkursa koji raspisuje Općinski načelnik za akademsku 2019/2020 godinu, a koji se objavljuje na službenoj internet stranici Općine i Oglasnoj ploči organa.

Rok za podnošenje prijave(zahitjeva) je 15 (petnaest) dana od dana objavljivanja Konkursa na službenoj internet stranici Općine i Oglasnoj ploči organa.

Član 4.

Uz prijavu na Konkurs za dodjelu stipendija podnositelj je dužan priložiti slijedeće dokumente:

- Prijava (zahtjev) sa kraćom biografijom
- Uvjerenje o prebivalištu (CIPS),
- Uvjerenje o upisu na fakultet za tekuću akademsku godinu 2019/20 kao redovan student (prvi put)
- Prepis ocjena s fakulteta za redovne studente (II, III i IV godina) a ovjerena kopija svjedočanstva završnog razreda srednje škole i svjedočanstva o maturi za studente koji su upisali prvu godinu studija u akademskoj 2019/20 godini.
- Ovjerenu i potpisanu izjavu da nije korisnik druge stipendije (ovjerena kod nadležnog organa)

Član 5.

Postupak izbora kandidata po konkursu provodi Komisija za provođenje konkursa za dodjelu stipendija koju imenuje Općinski načelnik.

Komisiju čine predsjednik i dva člana.

Komisija za dodjelu stipendija je dužna razmotriti sve prispjele zahtjeve i utvrditi rang listu kandidata prijavljenih na Konkurs koja se ističe na oglasnoj ploči općine Bužim i dostavlja Službi za opću upravu i društvene djelatnosti.

Član 6.

Služba za opću upravu i društvene djelatnosti vrši izbor stipendista u skladu sa utvrđenom i objavljenom rang listom Komisije za dodjelu stipendija.

II USLOVI ZA DODJELU STIPENDIJA

Član 7.

Na raspisani konkurs za dodjelu stipendija mogu se prijaviti kandidati koji imaju prebivalište na području općine Bužim, a koji su redovni studenti na fakultetima ili višim školama u Bosni i Hercegovini.

Član 8.

Studenti koji su apsolventi, kao i studenti koji obnavljaju godinu ili su već korisnici stipendija drugih pravnih subjekata ne mogu konkurisati za stipendiju, niti će njihove molbe biti uzete u razmatranje.

III VISINA STIPENDIJE

Član 9.

Kandidat čija je molba za stipendiju pozitivno riješena, stiče pravo na stipendiju nakon potpisanog Ugovora o stipendiranju između stipenditora i stipendiste, odnosno roditelja ili staratelja.

Ugovor se potpisuje za 10 mjeseci računajući od početka akademske godine.

Član 10.

Visina stipendije za studente utvrdiće se na osnovu broja podnesenih prijava za dodjelu stipendija i iznosa planiranih grant sredstava.

IV PRAVA I OBAVEZE

Član 11.

Studenti (stipendisti) dužni su da redovno prate nastavu, odnosno da u predviđenom roku polože odgovarajuće ispite i regulišu druge obaveze predviđene zakonom, što dokazuju odgovarajućim aktom obrazovne institucije.

Član 12.

Stipenditor može raskinuti Ugovor o stipendiranju prije ugovorenog roka i zahtjevati povrat primljenih stipendija od stipendista, odnosno njihovih roditelja ili staratelja, u slijedećim slučajevima:

- ako korisnik stipendije svojom krivnjom prekine redovno školovanje;
- ako korisnik stipendije primi stipendiju od drugog davaoca;

- ako korisnik izgubi status redovnog studenta;
- ako korisnik stipendije neistinito prikaže uslove na temelju kojih je ostvario pravo na stipendiju.

V DODJELA DRUGIH OBLIKA POMOĆI

Član 13.

Pravo na druge oblike pomoći iz člana 2. ovog Pravilnika mogu se ostvariti na temelju zahtjeva tokom cijele akademske godine.

Zahtjev iz prethodnog stava podnosi se Općinskom načelniku, uz dostavljanje dokaza o opravdanosti zahtjeva.

Odluku o zahtjevu iz stava 1. ovoga člana donosi Općinski načelnik na prijedlog posebne komisije koju imenuje u svakom konkretnom slučaju.

Komisija za dodjelu stipendija je u mogućnosti da utvrđuje istinitost prikazanih uslova za ostvarenje prava na stipendiju, i o tome može sačiniti službenu zabilješku.

VI ZAVRŠNE ODREDBE

Član 14.

Stipendista općinske uprave Bužim, ne može biti uživalac stipendije od drugih pravnih subjekata.

Član 15.

Od povrata stipendije, iz člana 14. ovog Pravilnika oslobođeni su studenti bez oba roditelja i djeca pod starateljstvom, djeca sa tjelesnom, mentalnom i senzornom ometenošću.

Član 16.

U slučaju odbijanja zahtjeva za dodjelu stipendije, podnosilac zahtjeva ima pravo žalbe.

Žalba se podnosi Komisiji općinskog vijeća za žalbe u drugom stepenu u roku od 8 dana od dana objavljivanja utvrđene liste korisnika stipendija od strane Službe za opću upravu i društvene djelatnosti na oglasnoj ploči općine Bužim.

Odluka Komisije po žalbi je konačna.

Član 17.

Pravilnik stupa na snagu danom donošenja, a isti će biti objavljen u Službenom glasniku Općine Bužim.

Obrađivač: Elvira M.

Broj: 02-34- 1698/20
Bužim, dana 17.06. 20

